

Stai si, defenda,
Romontsch, tiu vegl
lungatg.



«Ils Romontschs che nus entupein a Berna ein urbans, aviarts e poliglots. Ozildi ei romontsch cult, sco per exempel quels hip-hoppers romontschs ch'ins auda el radio ni vesa ella televisiun: quels ein ,in'». Quei manegia in collaboratur dalla Canzlia federala. Vinavon gi el lu aunc: «Gl'ei schon legher co vus navigheis cun quei lungatg aschia ,by the way'». Jeu sun perplexa e realiseschel che miu collaboratur ei buca pertscharts ch'il romontsch ei nies lungatg mumma e pia lungatg da famiglia. Ed el ei surstaus cu el auda che mes geniturs discurrevan cun nus romontsch – e mo romontsch. «Aber fagend termagls tschintschavas guess tudestg, ni buca?» damonda el. Na, na, co fuss ei stau pusseivel da dar giugs, far da sezuppar ni emprender dad ir cun skis auter che per romontsch? Tudestg havein nus gie empiru pér en scola – sco nos cumpatriots ella Svizra franzosa ni taliana. Per nus ei e resta il tudestg in lungatg jester. «Uff, quei ei gie bunamein pli dir che pils Secondos!» excloma miu collaboratur.

Questa cuorta conversaziun ha dau d'entellir a mi che quei che secapescha dil tut-tafatg persesez per nus Romontschs vegn percepiu el rest dalla Svizra autr'uisa. Era sche certs fatgs basics ein enconuschents sco per exempel ch'ei dat rodund 40'000 persunas che tschontschan romontsch e ch'il romontsch ei in lungatg naziunal. Ni era che la Confederaziun translatescha texts impurtonts per romontsch e che radio e televisiun romontscha emettan mintga di emissiuns romontschas. Per nus ei il romontsch denton ina part natirala da nossa identitad. Ina identitad

sut la quala nus pitin meinsvart naven dil mument che nus mein a scola. Gie, nus stuein emprender tudestg ed auters lungatgs jasters da funs ensi. Las cundiziuns socialas ed economicas ed il pignintschess sforzan nus d'emprender auters lungatgs – per saver survivor. E savens vegnin nus ris ora perquei ch'in artechel ei forsa buca il dretg, in casus sutsu ni ina locuziun fallida. Nus stuein secumprovar e mussar che nus savein tudestg aschi bein sco quels, per ils quals tudestg ei lur lungatg mumma. Pér lu vegnin nus pri serius. Nossa identitad secapescha buca da sesez. Nus stuein sedefender per quella.

E quei ei fundamental. Il romontsch viva. Il romontsch ei nies quart lungatg. Il romontsch fa part da nossa cultura. Gl'ei impurtont che nos cumpatriots da lungatg mumma tudestg, franzos ni talian seigien pertscharts ch'il romontsch ei nies lungatg mumma e nossas ragischs. E che quei lungatg minoritar ei part da nossa cultura e mereta susteniment e promoziun per saver exister vinavon. Daventar Canceliera ei stau per mei in privilegi. Quei uffezi ha dau a mi la pusseivladad da s'exprimer mintgaton en miu lungatg mumma sin palanau federal. Cu jeu fagevel quei a bucca vesevel jeu mintgamai in surrir sillas fatschas digl auditori. Denton plaun a plaun hani acceptau ed eini s'endisai vid plaids da beinvegni ni cartas da gratulaziuns per romontsch, tscheu e leu accumpignai d'in verset ni d'in bi sgrafit da tiara romontscha.

En quei senn: stai si, defenda, Romontsch, tiu vegl lungatg.

IL ROMONTSCH – INA PROMINENZA NUNENCONUSCHENTA

Corina Casanova | Berna ●

LESEN SIE DIESE "OPINIONE" AUF DEUTSCH
AUF WWW.BABYLONIA.CH
> Nummer 1/2016 > Opinione

Corina Casanova

Die Juristin Corina Casanova war vom 1. Januar 2008 bis 31. Dezember 2015 Bundeskanzlerin der Schweizerischen Eidgenossenschaft. Sie wuchs in den romani-schen Dörfern Ruschein und Tarasp auf.

